

յայտում է իւր սեպհական հայեացքներն ու համոզումները, իւր սեպհական հոգւոյ վիճակը, որովհետև ժողովրդական ստեղծագործութիւնը և՛ անհատի և՛ բազմութեան ներքին աշխարհի յայտարարն է: Ժողովուրդը բանահիւսութեան մէջ պատրաստ նիւթ և ձև է գտնում իւր ներքինը արտայայտելու և հոգեկան պիտոյքներին գոհացում տալու¹⁾: Մենք ականատես ենք եղել թէ ինչ տպաւորութիւն է թողնում ժողովրդական վէպը ունկնդիրների վերայ և ինչպիսի ոգևորութեամբ է պատմում պատմողը. հանձարեղ բարոզիչն անգամ հազիւ կարողանայ այն քաղցր տպաւորութիւնը թողնել, այն հանգիստ խորհրդածութիւնները առաջացնել ունկնդիրների մէջ, ինչպէս ժողովրդական վէպի լաւ պատմողը: Ժողովրդական վէպը վառում է ունկնդիրների ազգասիրական զգացումները, ոգևորում է նոցա առաքինութեան յաղթանակներով, զարթեցնում է նոցա մէջ բոլոր այն բարձր կողմերը, որ պատկերացրած է հերոսների անձնաւորութիւնների մէջ: Այժմ հասկանալի պիտի լինի, թէ ինչու Հոմերոսի ստեղծագործութիւնները այնքան յարգի էին հին Յոյների մէջ: Իլիականը Յոյնի համար և պատմութիւն էր և դիցաբանութիւն և բարոյական սկզբունքների աղբիւր. իսկ Իլիականը ոչ այլ ինչ էր, եթէ ոչ Յոյն ժողովրդի անզիր քանահիւսութեան մի գեղեցիկ արձան, որի մէջ այնքան հրաշալի կերպով մարմնացած էին Յոյնի կատարելութիւնները: Ռուստեմը, Ջոհրաբը հին Պարսկի հոգեկան մրցման ներկայացուցիչներն են, հին Պարսկի վեմ ձգտումների և կրօնական հայեացքների մարմնացումը: Ռոլանդը աւպետ Ֆրանսիացու ազնուութեան, հայրենասիրութեան, հաւատարմութեան և քաջութեան կատարելատիպն է. Խանդուղ Խաթունն ու Մարգարիտը Հայ կնոջ հաւատարմութեան և ընտանեկան կեանքի մաքրութեան նշանաբաններն են:

Ոչ սակաւ նշանակութիւն ունին ժողովրդի համար և աւանդութիւնները. դոքա նորա սրբութիւններն են, որ սերունդէ սե-

1) Буслеевъ-ի Истор. Очерки.